

乾隆歷城縣志

歷城縣志卷第三十八

列傳四

國朝

孫建宗字毓祺其先自棗強遷於縣父止孝見忠烈傳
建宗崇正十六年進士入

國朝授祁縣知縣分校鄉試號得人行取戶部主事殫心
會計吏胥不能為姦順治三年充山西正考官事竣遷
郎中七年出為睢陳兵備道僉事郡縣經兵燹後一望
榛莽建宗招流亡善拊循之頗有起色撫按交章薦治
行卓異擢通政司叅議歷順天府府丞四夷館少卿太

常寺卿遷大理寺卿悉心平反轉都察院右副都御史
慨然以肅綱紀為已任上三疏皆蒙嘉納出為陝西左
布政使陝西歲輸不及三百萬而支發之額倍之建宗
裁陋規革浮費日夜焦勞形體尪羸十四年內轉太僕
寺卿卒於道年五十五祭葬如例建宗為人和易不以
已長形人短而治事必躬親無刻晷之暇遂以此致疾
子珏觀城縣教諭歷國子監學正兵部司務建宗兄子
琬字姬玉有義行惠宗嗣子惠宗事見忠烈傳琬長子
宏祖次子續祖宏祖字適來善制義康熙丙子科其文
房考薦甚力主司秘藏笥內發榜時竟忘之由歲貢選

日照訓導未任卒續祖字于萬十歲應童子試人目為
神童雍正八年進士授南樂縣知縣潔已勤撫字善防
胥役舞弊田夫野老咸登堂上壽三年以迴避離任所
攜惟書數篋耳委署正定地有名魏國公屯田如千頃
賦數倍於常續祖請於上官得減賦視他田以公事過
南樂百姓空城出迎擁輿不得行補滿城奉檄興水利
於白草溝金線河建石閘晝夜走河千工竣而以勞致
疾卒官縣人請祀名宦祠宏祖子維宸字子襄由歲貢
官蘭山訓導不索諸生一錢以老歸

孫尚採訪

劉緯字光宿順治三年進士授崇明知縣調盱眙有能

名卒官祀鄉賢在前明與葉承宗友善嘗預修縣志其同訂者趙天開孫建宗蒐采者楊衍祚參閱者陳文鶴王鶴較正者葉承祧編次者薛齊皆縣人

韓燭採訪

葉承祧字非紹其先麗水人成化初有金吾尉寶者從德莊王之國因家焉實承祧高祖也承祧少補諸生有志畧順治四年兄承宗知臨川縣承祧從之明年冬斬鎮金聲桓叛來攻承宗俾暫歸避之承祧曰弟去誰左右吾兄者承宗被執以死殉事見忠烈傳承祧火其尸而匿井中賊索之急乃夜墜城奔告征南大將軍固山額正譚爾泰爾泰嘉其義勇奏授興安知縣地萬山叢

薄多虎患承祧仿韓愈祭鯉魚為文驅之虎皆匿跡而
遺黎寥寥村落少人烟承祧多方招徠給牛種減徭役
數月而流亡漸復會議興屯田撫按交章薦其能乃以
同知任湖東三府屯務一年即有成效著屯政條議一
書貴溪南有湖亘千里盜據為藪出沒不時承祧躬往
諭以禍福雜髮投誠者三千人餘黨悉平十五年補平
陽府同知嚴保甲議離政能聲甚著康熙元年擢西安
府知府與屬吏約無愆法無生事凡獻牘皆手定姦胥
計無所施開關中書院時方革制義課士用策論講求
根柢之學五年舉鄉試十六人旋舉禮部者七六年九

月卒官年五十八承祧貌豐偉習於吏事剴決酬應無

虛昇竟以勞致疾沒後部民哀之至輟春罷市云

張廷棟

燭探

柴自新字鼎臣濟南人以署守備防駐延平府時將樂

賊吳賽娘聚眾踞寨自新單騎入寨諭以禍福於小樓

上置酒結誓犒其將領於樓下至二更自新拔刀斬賽

娘首以衣裘之下樓突圍出賊黨遂遁

福建通志

孫光祀字溯玉號祚庭其先平陰人光祀通籍後始遷

於縣光祀順治十二年進士改庶吉士明年授禮科給

事中上疏陳慎銓選核鎮將覈贖鍰剔衙蠹禁濫徵酌

科議六事皆中利弊部議允行歷刑兵戶吏四科都給事中六年中疏凡二十餘上悉奉

溫旨褒嘉典試湖廣取士百六十人而捷南宮者六十四得士稱最盛遷太常寺少卿假歸康熙元年補四譯館少卿修葺館署考校譯字生四十人請復舊制兼翰林職著為令館中勒石紀德轉右通政使十二年充殿試讀卷官晉太常寺卿會天壇有牧馬者

上遣內侍察堂官職名或謂光祀任甫三日可勿預光祀曰居其職敢諉其過乎遂與同官俱列名罰俸三月其年遷通政使擢兵部右侍郎吳逆告變光祀密疏請誅其子

應熊以杜內患三藩克靖中樞有力焉十八年充殿試
讀卷官京察自陳乞休賜蟒服回籍年八十五卒子叔
諧舉人候補內閣中書叔詒字燕叔康熙二十六年舉
人選渠縣知縣渠經兵燹又旱不雨叔詒宿禱城隍
廟立應勤招徠廣開墾民有起色任七年行取擢兵部
車駕司額外主事以勤慎宣授刑部湖廣司主事遷山
西司員外郎署河南浙江等七司兼理秋審皆剖判如
流假歸久之再補刑部四川司員外郎充順天鄉試同
考官遷戶部陝西司郎中為侍郎遂寧張公所器異以
刑部舊事罷叔詢鴻臚寺寺丞

據王校孫公墓誌
銘及孫氏家傳

朱宏祚字徽蔭其先高唐州人父美先字少川明季始遷於縣以義行重於鄉有盜劫其僕既而知為美先物皆還之兄昌祚順治初入漢軍籍官至總督直隸河南山東三省諡勤愍而宏祚居歷城遂為縣之巨族宏祚年十九舉順治五年鄉試又二十二年始授盱眙知縣革供上灘派千金俗好訟輕生為揭律通衢訟以衰止歲旱賑饑有法鄰封就食者盈萬時蝻生遍野倏有羣蝗過境蝻皆附翼飛去舉治行卓異

賜蟒服行取授刑部廣東司主事遷貴州司員外郎兵部督捕郎中出為天津道按察司僉事遷直隸布政司叅議畿

輔故不設布政按察二司以守巡二道分領錢穀刑名
權埒藩臬宏祚為守道出

聖祖特簡又二年有巡撫廣東之

命以少叅躋開府前此未有也陞見奏對稱

旨賜內帑千金并鞍馬以寵其行過庾嶺除役夫之繁者廣東

自用兵來無執之征浮於正供悉罷之鹽法為藩下姦
人踞阜害黿莫敢譙訶之宏祚條八疏入告衛所屯田
畝徵米三斗三升宏祚請依民田徵八升皆允行臨高
澄邁吳川諸縣兵燹後積逋累萬皆請蠲賦流亡漸復
陽山阜商被盜擒獲黎王璣等三十餘人置大辟宏祚

訊得其情獲末減逆藩平後姦民告誥無已宏祚上疏
謂當藩焰方張聞風投冒倚其聲勢者實繁有徒迄今
平定經刑部侍郎宜昌阿來粵其應歸旗者已著籍解
京餘俱放為民十餘年來皆補行伍或歸農或死亡遷
徙無籍可稽今姦民視為奇貨蔓引株連請下部定議
不允其告告者治以妄首之罪疏上得請康熙三十一年
遷浙閩總督時歲祲有司議使富民捐賑幾致變宏
祚嚴禁之臺灣初入版籍禁稍弁侵擾會廣東巡撫與
巡鹽御史相訐奏

命宏祚往勘又命往江南視太湖水利皆異數也三十三年大

計以疏內地瘠民餽四字不稱

旨免歸三十九年

命分修河南河工勞瘁致疾遂卒於淮南之高良閘年七十一

宏祚明敏遇事有為嘗因陛見奏曰臣荷殊恩當為人
所不肯為不敢為者人謂其無媿斯言子緹絳綱續緹

緹見文苑傳

據朱氏族譜及江南通志王士正墓誌銘朱彝尊神道碑

絳字子垣由高唐諸生援例授刑部貴州司郎中出為
永州知州清慎自矢吏民畏而懷之內艱服除補銅仁
大計卓異擢廣東肇高廉羅道副使廣東為宏祚秉鉞
地父老猶感其德聞絳至皆迎而羅拜絳訪求利弊捕

巨寇數人境內肅然雍正元年遷廣東按察使

布政使以病歸又八年卒

朱彤錄送

綱字子驄年十三補高唐州諸生以貲授兵部武庫司主事外艱服闋補武選司丁母憂起補原官遷職方司貢外郎轉刑部江西司郎中有婦為強暴所殺所司累訊不得其人綱馳至婦死所曰汝烈婦也精爽當不沒勿使殺汝者得逸覆審遂得殺者而其衣已泔無左證綱曰日中視之必有血痕驗之果然暴伏法而婦得旌表監督富新倉綜覈有法總督倉場施某薦之遷天津道副使康熙五十四年靜海諸縣蝗綱虔禱於神一夕

蝗盡去兩遇水圍蒙

賜御書克食詢問家世甚詳綱奏對稱

卅五十八年擢直 巡道

詔朱綱雖非進士出身素知其有文免繕履歷一時榮之六十年遷河南按察使多所平反雍正元年遷湖北按察使時河南旱荒綱方監賑衛輝彰德懷慶歸德四府巡撫奏留事歲而後之任及抵湖北三月即調湖南清欺隱之弊又頒六條示屬吏大畧崇節儉慎用人綱往來洞庭湖目擊覆舟之慘造救生船十餘分直琴棋望銅盆湖九馬嘴布袋口諸險地雍正五年晉雲南巡撫時西

藏用兵綱鉤稽隱漏以儲糧振業弊一清調福建比行奉

旨朱綱秉公正直毫不瞻顧可謂實心扶持風化之大臣綱起

身赴閩滇人當尊敬盡禮以榮其行六年六月受事福安洋盜橫虐縣獲其黨而遺其魁綱遣弁兵立擒之俄卒官年五十五詔加兵部尚書銜俾省城官吏集送所過州縣官升親往奠醊抵里使入城治喪諡勤恪綱從

弟綵

同上

綵字萊禱康熙十二年進士授內閣中書舍人遷刑部江南司主事歷負外郎郎中三十七年擢鄖陽知府多

善政其尤著者附郭武陽堰為洪水所壞百年矣綵竭
囊金督修未匝歲堰成民賴之四十八年自春徂夏靈
雨六十餘日隣境閉糴百姓無所得粟綵議借存倉均
貯米以活鄖民吏以未經上請白曰民命至重而拘文
法可乎脫獲罪予獨當之遂出米以賑全活無算年七
十三卒於官士民合詞請祀名宦

同上

鄭績善字元長其先由濟南徙京師世襲千戶終明之
世不絕績善以京營官生授紫荆關都司僉書遷薊鎮
松棚路遊擊順治十三年為山東撫標右營叅將慨然
曰此吾先人桑梓地也因家焉歷甘肅鎮永昌叅將山

西汾州營參將皆著勞績以病歸續善好文翰若有金
川集其去永昌有為立去思碑者畧曰永昌山槎而水
駛田皆磽确地當東西孔道軍民疲於奔命又青海諸
部逼處藏南耽耽思逞公下車目擊凋敝狀喟然思有
以振起之撫恤勞卒甘苦與共蘇息行戶值錢隨給又
折節下士勸蠲輸以活流亡浚城隍建堞櫓築垣墉夙
夜殫瘁美政畢舉曩歲黃台吉別部跳梁犯塞公以恩
信招徠咸惴惴聽約束相戒不敢犯金川蓋續善實能
盡職故部人頌之如此

李枝華
採訪

張現字槐亭縣北鄙人少好武康熙十三年由行伍授

把總十七年從將軍楊征閩藩十八年賊數十萬分屯
灣頭等地列寨亘三百餘里進勦以現為督陣執刃大
呼連戰皆捷以優等議叙十九年賊屯烏嶼橋現焚其
船又攻陳洲獅子山觀音山諸地身經數十戰破漸山
等十九寨海澄縣孤懸海上提軍段某被賊引海水覆
其軍遂為賊巢大兵進搗現乘桴深入殺賊頗多海澄
既復又隨將軍取廈門金門凱還以功授部劄守備二
十年授左都督二十二年以左都督管四川夔州協遊
擊事仍帶餘功五次二十九年營南城守營叅將事三
十六年營湖廣寶慶協副將事皆帶餘功如故年如干

見蒙

卒官

張元宗錄送

也春貴字培元本姓也蓋也先之裔康熙二十一年內行伍從征福建耿逆攻朔湖十八寨有功耿逆平二十二年引

賜今姓授福建詔安營游擊加左都督加五級仍帶餘功五次歷陝西漢風營叅將遷浙江瑞安營副將管總兵事五十七年年七十一卒官祭葬如例子承聖承盛承聖字希菴由廕生歷官奉天府治中遷錦州府知府入為戶部湖廣司郎中以事降澤州府同知解馬甘肅時川陝

總督奏請能吏治軍需者調涼州府同知遷知府乾隆六年以病歸承盛字祈如由山東撫標馬兵授把總歷千總雍正二年保送引

見授藍翎侍衛出為四川成都城守營守備七年遷建昌鎮中

營游擊卒官

趙壽元
錄送

陳有功父某山東撫標千總有功由行伍以康熙十八年從征閩寇戮力行間者三年念族兄國興年老以所得剗付贈之國興得授武清游擊有功歸仍以行伍隸撫標又隸登鎮為總兵岳昇龍所器三十二年授萊州營把總擢德州千總以解囚道逸褫職會昇龍由天津

鎮征噶爾丹奏請有功自隨從大軍至四十一歲凱旋
昇龍遷四川總督有功隨往三十六年授松潘把總歷
千總遷龍安營守備奉檄征打箭爐奮勇爭先率兵由
張谷塞赴瀘水西取大岡數戰皆捷四十一年叙功遷
永寧協標右營游擊擢山西偏關叅將未行連遷浙江
樂清副將福建汀州鎮總兵官三月三遷有功感恩益
自奮立碑自述生平不欺人歷險阻不變節雍正五年
年如干卒

賜祭葬贈都督同知子某以廕仕至貴州道

據自述碑

戴璠字負若其先蓋州人世為武職父聖聰官江南副

使居濟寧璠遷於縣康熙八年舉順天鄉試十五年成進士以父母年老不謁選久之授太常博士於行戶無所科率遷兵科給事中旋掌工科印上疏陳馬政屯田切中利弊皆報可江西知縣黃某領憑一年未之任其人頗有所倚恃璠糾叅之人服其敢言二十五年典河南鄉試號得人連丁內外艱服除補原官稽察寶源局兩掌登聞鼓遷奉天府丞督學政擢通政司右叅議俄遷太僕寺卿奉

命祭告舜陵以老予告五十八年卒年八十璠外舅王愍愍先後贈璠不下萬金及王惟禍以所積盡付其家子六人

第四曰文諦拔貢生教習期滿候選知縣好施予江南
陳某者嘗游於京師後流寓濟南厚卹之送歸里文諦
子煌以州同署武陟縣丞有能名第五曰諒康熙己酉
年舉於鄉授內閣中書舍人善筆札

朱彤
採訪

張世祺字肇祥其先河間人明成化間徙濟南六傳至
世祺舉康熙十一年鄉試久之選遂溪知縣縣徵糧舊
有浮費世祺密除之為勒石紀其事三十八年分校四
川鄉試所取半知名士四十一年大軍征打箭爐檄世
祺收散軍糧備歷險峻以勞績著事平行取工部營繕
司主事管寶源局督修瑠璃河有功遷都水司員外郎

四十八年考選校掌山西道監察御史巡視南城上疏
言今刑官於重案不能速行審擬以致囹圄壅積聞現
收刑部獄者多至一千三百七十餘人地狹不能卧皆
排立今當溽暑稔惡鬱蒸不能保無疫癘請飭速為清
理其罪輕應發遣及牽連者宜即發遣或釋放俾無淹
滯并通行各省以此清理報可得釋者數百人五十年
轉江南道歷掌山東陝西河南諸道掌登聞鼓疏劾福
建督撫滕溥成獄其畧曰福建解到盜陳五顯等二十
二人有司擬置大辟臣與監察御史董宏彪赴刑部審
三日竟有與原揭懸絕者二十二入今實二十人惟五

人實經審訊餘十五人有在獄從未訊者有縣府雖審而院司未訊者亦有拷至六七次未承者虛懸定罪其草菅人命尚忍言哉又馮秘者一無鬚少年自稱二十歲而原揭註四十九李瑞自稱六十三蒼顏白髮原揭註四十一若問官果皆親鞫有如是之顛倒者乎且有以弟代兄父代子者臣思督撫掌封疆臬司總刑名守令膺民社遇此重案竟假捏朦溷其何以成信讞乞令法司同鞫若臣言不虛則將諸臣下吏治罪疏上

詔總督范某等自陳得釋者十餘人范遷左都御史以前奏器世祺謝曰道長教我世祺後以范某薦遷通政使司右

參議年七十致政歸又十年卒

周永年錄送

杜溥字魯菴康熙三十二年援例授襄城知縣縣儒學遭闖寇後盡圯溥捐俸重修又勸募撤舊城而新之屹然稱金湯歲旱請於上開廩賑濟東南境多盜捕其魁置於理餘悉散去時移陝西兵鎮荆襄溥銜風雪僕僕郊原供億無缺而民不知擾汝水自南門外通江淮商賈往來民收其利後沙壅水淺舟不得行溥復鑿通之黃河去襄城三四百里嘗檄夫修築溥力陳疾苦民得休息任三年縣人作歌頌之

朱彤孫尚採訪

趙于京字豐原其先大興人父士通遷於縣于京雍正

有幹名康熙三十二年由舉人選城武教諭導率有方以卓異擢臨潼知縣抵任甫五日理滯獄囹圄為空地當孔道官馬或不敷民間舊有貼馬錢于京盡革之任佑中者縣巨猾也構訟稍不如意閉村堡奮臂抗官養健兒為爪牙前官莫可誰何于京圍其家擒黨與十數人佑中遁京率卒襲捕之置於法渭水沒田萬餘畝民逋賦累千金代輸之而去其籍遷綏德州知州臨潼老幼提挈送者盈街巷多至泣下四十一年至綏德有飭報墾田起租之檄他州縣承上官意率多報以邀功于京獨默然若無事吏請至再三叱曰國家太平六十年

尚有未墾地乎且延綏傍山多沙磧雨少不繼則成石
田耳堪增稅以困吾民耶竟無所報四十二年

車駕西巡于京扈

蹕至華陰

召見奏對稱

旨命講周易賦詩

賜御書授河南知府數月丁母憂無以治喪河南巡撫徐潮賻
之乃歸會潮入覲

上問豫省循吏潮以于京對因奪情復任于京乞假營葬畢始
行洛陽南村有雕木為佛像者藏機於內使耳目手足

皆動謂之活佛惑愚民為姦利于京焚其像而杖之妖
言頓息盧氏山有礦洞四方無賴子鳩衆擅開架屋為
村舍具什器勢漸熾不能禁于京選能吏協營弁率衆
焚其巢決山渠水以灌洞事乃定宜陽民喬宗仁飾博
具誘人財無以償有致之死者于京立斃之作新建倉
初奉

旨勘三門議貯漕糧事宜于京上議其畧曰近河倉廩相傳在
鞏縣者為隋洛口倉即漢成臯地陵谷變遷遺址無存
其南阜者險峻低平者陰濕多沙勢不可建陝州西南
六里舊有隋建太原倉又陝州之集津倉唐開元置於

三門以集漕運遺蹟皆莫可考惟州城內地壇與而臨河且已過三門之險建殿於此密邇汾渭甚便後既定於河南府城建倉復上議以為功大費繁非可猝就當預籌者三事上官採其議貯穀得無悞四十五年商雜賊萬餘據山連盧氏閬鄉界郡城戒嚴懷鎮門某率精甲五百來會乃偵訪通賊要路分守三十餘所賊知有備竟不敢犯境會大雪喜曰賊降矣或請其故曰山中無宿糧所恃以苟延者刦遠村耳當此嚴寒能荷戈履冰行乎後五日得潼關檄果如所料守河南前後凡四年遷蘇州知府疾作未之任卒年五十六于京性尚忠

義喜文學其官城武修文亭山曾子祠漢忠臣佗侯廟
於臨潼表渾太師段太尉墓新其廟立樊舞陽祠修橫
渠書院與李顥王心敬相友善使二子從顥受學於緩
德建韓蘄王祠於河南建狄梁公祠新天中書院所
在捐俸修孔子廟諄諄以課士為務去後人皆思之

訪

何永盛

高經世字寧遠康熙三十一年由歲貢任諸城訓導歷
金鄉訓導四十三年奉檄賑蒙陰沂水二縣民蒙實惠
胥吏無所侵蝕越數歲民為製衣帽送至家以老歸年

九十餘卒

黨其遊
採訪

張光祖歷城人康熙三十八年知萬州揭先勞二字於
退食齋徵收錢糧立分限程期民不擾而鮮逋賦州多
陂塘洪口陂為利最大光祖嚴疏濬潤田數千頃歲凶
無憂祀名宦

廣東通志

逮選字萬青其先章邱人自背田知縣甲遷於縣四傳
至選聰敏有智畧由長清諸生拔入成均廷試第一補
八旗教習康熙四十二年

車駕東巡選獻賦

命直南書房兼恒親王講官時

世宗在藩邸書賜慈闈燕喜額為其母壽充佩文韻府纂修官

書成授上高知縣五十三年入外簾經題稍僻士鼎沸
監臨官計無所出選細為解釋乃帖然閱卷決文字中
否揭榜皆如其言以卓異遷霸州知州選因畿甸多水
患日考諸河源流及其道之通塞隄防之修廢圖藏笥
中及雍正四年

命開水利營田府怡賢親王主其事以選詣水道奏請離任
專理河工所繪圖經進蒙褒嘉晝夜經畫以勞績擢保
定同知因分貼上高倉穀去官乾隆八年年七十八卒

子天鴈以貲授安州州判遷祁州州同

張廷棟採訪

鍾護字德興其先宛平人父性樸官山東提學副使愛

濟南山水因築室金線泉家焉懷承家學砥行好義年
十七父歿家計蕭然重趼走千里啟祖父母柩同營葬
聞者難之由拔貢授泗水教諭釐正文體多士翕然向
風以疾歸年三十五卒弟轅字聖輿事母趙有孝聲兄
沒善撫其孤學詩於新城王士正由拔貢考充鑲藍旗
教習授桂平縣知縣地屬苗疆轅化導有方獠民帖服
康熙四十九年卒官幾不能殮

鍾勳
錄送

余肇松字茂嘉其先會稽人自其父遷於縣康熙五十
四年茂嘉由監生援例授太倉州知州遂姦胥獲巨盜
政聲甚著開覺寺僧無念者結豪右淫良家婦女鄉民

無敢忤者茂嘉佯不問一日訪至署杖殺之士民歡呼好事者為作蓮花報傳奇流播江南北不二年以疾歸

劉士忠
採訪

楊瑄字公璧父天奇自洪洞遷於縣見一行傳天奇二子長璋次即瑄由諸生授例為中書科中書舍人改雲南府通判與知府某論事不為屈上官廉其直表署陸涼州知州陸涼為古夜郎地西連霑益東接羅浮猓蠻不時出掠瑄執其渠魁餘黨遁去州旁有灌田水口久為隣封所侵瑄請於上官復之民以時蓄洩享其利以終養歸年七十四卒子士昌仕贛榆知縣兄子大中劉士

愚採訪

國朝

大中字靜函父璋援例授通判職七子皆貴大中其長也年十九孤諸弟皆幼大中友愛甚至為延師督課至於成立雍正二年大中以貢生由第七弟大立保舉授穀城知縣敦教化免民間一切科率衙齋蕭然如寒士其年秋江水暴發高數丈不及城者數武舉縣倉皇大中夜朝服跪禱泥淖中冰忽退士民感德為立碣曰楊公拜水處任一年卒官縣人爭賻之泣送其櫬以歸弟大勲大凱大紳大立

劉士愚採訪

大勲字彤一由貢生教習授虹縣知縣歷任山陽阜寧

遷滁州直隸州知州署太平知府大勲事母以孝聞居官澣衣蔬食能甘淡泊嗜書得舊本必補綴鈔寫以為樂積至數千卷示其子嘉樹曰三十年宦囊盡此矣吾不能效陸賈貽汝橐中金也著文選音義未竟卒年七

十一

劉士愚
採訪

大凱字又蒼偉軀幹挽強善射雍正元年武進士由御前侍衛轉達出補温州水師營遊擊改處州中營遊擊歲餘擢潞澤營叅將會準夷逆命

上命寧遠大將軍某備邊北境選良將勁卒從軍而大凱以本職應選

召見者十人大凱獨稱

旨加永固副將銜遂從大將軍出塞常為先鋒以勇畧著抵鄂爾坤扼虜之衝建受降城大凱董其事尅期而竣賊約期偽降乘隙襲我軍右師失備將潰大凱時領左師率鐵騎橫擣之賊乃退時兵糧例日給三合餘衆苦飢無敢為大將軍言者大凱請增至八合五勺士卒飽騰各營解火藥至軍卒私鬻於路易泥沙臨陣礮不發或諧之曰楊副將所解也大將軍怒呼詰之將徇於軍大凱從容言曰某有標記請驗之伏法無恨驗之大凱所解藥獨良初大凱戒軍吏書其封曰山西潞澤營軍吏或

以為無庸至是賴以免禍和布多之役天大霧咫尺莫辨大凱度敵已近發一擊遂進破其衆降之凱旋論功第一擢寧夏鎮掛印總兵官以地震免卒於家年如干大凱號令整肅倉猝不可撼塞外食貨倍值大凱教以節縮營貿採植為持久計奏捷後惟潞澤營歸有餘財性鎮細軍中或苦之號為楊碎碎云

張敬錄送

大紳字宜書府學生雍正七年由兄大勲保舉發雲南以州判試用上官委以烏蒙竣工值擢叛又委署宜良督運糧餉皆及時課下委留養難民大紳招徠安輯給衣食藥物全活者甚多

不授巧家營經歷遷昆明知縣其

地金汁銀汁二河歲久淤塞大紳請疏濬以利民運銅
北上道聞母喪歸服吟補銅山銅山為汪左劇邑黃河
繞城而下又連歲蝗旱大紳請緩征黜民困乾隆十八
年九月河決張家馬路數百丈督撫河院畢集河干議
北岸挑引河分水勢大紳首挑千五百餘丈總督鄂公
甚嘉之專摺保題明年委督商山堰石王四閱月雨澤
李家樓河岸復報險大紳適往築塞受濕熱致疾卒去
所年六十

同上

大立字華如年十六歲康熙五十九年武鄉試第二明
年以第二人及第選

御前侍衛雍正元年遷

乾清門頭等侍衛二年授廣東提標中營叅將仍帶孔雀翎子陞四川化林協副將六年加總兵銜隨吏部尚書查郎阿征西藏阿爾布巴等踰雪山渡瀘水深入賊地有功事平駐防泰寧建城十一年隨定邊大將軍平郡王勦準噶爾乾隆元年授直隸督標中營副將歷張家口副將浙江金華協副將十三年遷江西南昌鎮總兵官所轄江山險峻條奏防汛數事皆允行十五年因巡邊染瘴氣告歸十六年病痊授陝西河州鎮挂印總兵官領西連番地袤延數千里由部雜處號點悍難治所

理三營諸將多草菅番命不加撫卹大立奏免游擊都司各一人鞭守備千總數人諸將始戢值伊犁用兵羽檄旁午日夜靡定疾復作十九年三月卒於軍年五十四祭葬如例大立幼穎異好作詩善擊槩大書軍務之餘日揮數十紙於聲伎貨財無所好遇之循循若書生而任封疆三十年皆鎮靜有幹濟云

劉士愚採訪

高山字居東雍正元年進士改庶吉士授編修歷御史給事中出巡臺灣有惠政考滿當代遇番變設備捍禦獲賊千餘人賊偵知阻海無援仍糾衆圍城不解者數日忽有二三千人持棍奮擊賊少却山以兵繼之大捷

詢其人乃民間變急赴救者山更宣布

朝廷威德皆投誠歷按察使還福建布政使以効免弟封

朱鼎

封字龍門由諸生保舉授隴西縣丞遷淳山知縣張某者誣人為盜云於月下識其人封察其寃而張不服乃於望夜張燈雜跪其人於庭使張認之良久不能辨寃乃雪曲陽馬氏婦控項成王二等輪姦獄已上巡撫察有寃色仰封覆勘封至姦所見鄰舍鱗次詰曰豈有貞女拒姦大聲疾呼而人無救者馬語塞乃吐實所私詹某與項等有隙教之控也所活成等十三人調大同值

歲饑前令匿未報積屍滿野對三請發粟賑之對善折

獄人不敢欺以面黑呼鐵面青天終潮州府知府

朱彤
採訪

李治國字亮公世居杏園村康熙五十七年進士授寧

都知縣勸輸社倉有法為一省最用巡撫薦發福建以

知府用署汀州府治水患減糶民得不饑修復隆江書

院士大悅雍正五年補邵武府歷漳州延平二府皆有

聲以謗去官留辦滇銅歲事授平原州知州以母老陳

情改鄧州治國感恩益勤於吏事州境刀水嚴陵水汎

溢不時治國請修隄資捍禦刀水自新店舖至大孫莊

六十三里嚴陵水自上高梁至趙河口六七十里皆親

督舂鍾晝夜不懈建同文書院祀范文正公鄧人感德
即其旁為建生祠乾隆五年請養歸居數歲卒年七十

一朱彤
採訪

沈士英字翰宸父維鼎由錢塘遷於縣雍正間士英以
貲授崑山知縣改舞陽嘗杖殺巨盜總督田某稱其能
調繁商邱鄉官有虧帑者事甚急士英善為區處以事
鐫一級引

見奏對稱

旨擢刑部主事遷負外郎山東饑命勘事竣以巡撫岳濬薦遷

河南司郎中年五十一卒官
沈佐清錄送

黃曾字省齋弱冠補諸生由捐貢授金鄉訓導善教士
雍正四年改選發河南以知縣用補光山歷福建之福
安海澄連江漳浦諸縣所至興教化察疾苦勸開墾民
賴以殷足漳浦俗輕生好鬪感其誠惡習頓革丁母憂
歸服闋乾隆十九年舉鄉飲大賓未及行禮病卒年七

十一

劉士愚採訪

馮秉仁字體元其先杭州人自父繼祖籍於縣秉仁生
九歲能背誦五經十四歲補運學諸生試官器異之乾
隆元年舉鄉試明年第進士改翰林院庶吉士授編修
五年稽察右翼宗學事務六年冬輪進經史講義

召見養心殿問疏中所引典故皆條晰以對

天顏霽悅且為指示文義所未盡者七年遷侍讀稽宗學如故八年擢浙江道監察御史歷署陝西山東諸道九年新葺翰林院落成

賜宴十一年瀛臺

賜宴皆與賦栢梁體詩十二年副刑部侍郎錢陳羣典江西鄉試悉心甄別十三年巡視北城未數日轉兵科給事中巡視北城如故折獄精當而出以和平不事刑挾曲直自判旋以疾卒年三十九

程世驥
錄送

曾尚增字謙益宗聖六十六代孫也其先嘉祥人後遷

於縣之鑛村而注籍長清尚增工制義敏察世事顧務
為篤厚無圭角乾隆二年成進士改庶吉士授蕪湖知
縣賑饑無弗遍捕蝗萬頃湖蝗盡而民不擾擢廣德州
知州丁內艱補平定州丁外艱補郴州三州皆直隸尚
增俱有惠政在平定柳修學宮建義塾勸民墾田康德
民爭河水經三官五年不結尚增親勘兩造村民各數
百人來偵聽立如堵墻勢洶洶訟負將死鬪尚增以數
健卒夾其魁與周視形勢開導明切其魁內媿叩服餘
黨散去又千總吳某多力而慙得罪捕急登閣上飛瓦
不肯下守備將發兵圍之尚增曰是激變也至閣下數

言吳來手下就理其臨事有識類如此乾隆二十三年冬柳署內室不戒於火妻張及次女皆焚死語在列女傳尚增自是委頓多病遂解組又二年卒於柳之館舍

年五十三

韓炳張廷棟採訪

劉應麟字軒來其先慈谿人父某遷於縣應麟少補運學諸生有聲士林第乾隆二年進士授壽陽知縣署屯留革里下科率訓靈石絕苞苴嚴條教值歲旱步禱於介之推廟距城五十里將至廟大雨如澍是秋倍收十三年金川用兵日需馬八十匹又督治雲梯皆無誤而民不擾解組日囊橐蕭然民送者多泣下應麟未仕前

授徒齊河馬氏歸仍館其家從遊甚盛晚年終日靜坐
嗜禪理三十二年一夕無病卒年七十五

劉士恩
錄送

李惻字良輔其先洪洞人遷於縣五傳至惻弱冠補諸
生有文名援例授戶部陝西司員外郎慎於其職簡通
州倉器具敝壞而內務運糧無水脚役者修整為累惻
乃自出資應之役始不病事竣遷刑部江西司郎中嘗
語同官曰凡成讞皆經督撫府縣數訊而後達部苟非
實有疑竇而經駁覆鞠其貽累恐有不忍言者幸勿有
成見必以平反為能也人以為名言移病歸又三年卒
兄偉字觀我事繼母以孝聞途遇賈人被盜失百金將

自盡俾贈如其數以武舉終

汪居敬朱彤
鄭銘採訪

汪航字仙木其先臨清人父錫修始遷於縣年十八補諸生雍正間援例授松江府通判司捕盜賊能盡其職諸生某糾修橋梁鄉官與有隙者誣以葺舍盜官石訟不解知府周俾航鞠之航親至泖湖周視力為消雪生獲全上官委令押運先是糧艘行漕河每為商賈患航嚴飭旗丁俾分風孽流魚貫以進於客舟無所擾會太倉旗丁有與民易錢相諍者航以未報免官年七十一

卒

朱彤鄭
銘採訪

崔雲會字萬清乾隆十四年由舉人發安徽以知縣用

署廬州通判安慶同知理差務不擾民署蒙城旋補涇
縣縣人好訟雲會力懲之坐蒙城事降調十八年發江
蘇勘山陽安東賑務按戶稽視期於無遺事竣補吳縣
縣丞捐復知縣歷署太平同知廣德州判舒成阜陽諸
縣在阜陽捕獲巨盜有能名又署英山裁汰花稅民德
之補當塗未之任卒

張蕃
採訪

歷城縣志卷第三十八終

歷城縣志卷第三十九

列傳五

儒林

前史以傳經者列儒林能文章者列文苑縣中操觚屬簡之士彬彬盛矣而傳經者蓋尠予徧剔載籍僅於漢得四人魏一人明二人雖世代相懸出處異致然皆深於經義承師授徒非空談性命之學者比也伏勝號濟南生而墓在今鄒平境故弗及焉作儒林傳

漢

張生濟南人與歐陽和伯同授尚書於伏生張生為博

士以授夏侯都尉都尉傳族子始昌始昌傳勝勝傳從

兄子建由是出書有大小夏侯之學

見前漢書儒林傳

林尊字長賓濟南人事歐陽高受尚書為博士論石渠

後至少府太子太傅授平陵平當梁陳翁生由是歐陽

有平陳之學

同上

徐巡濟南人師事衛宏又從杜林受古文尚書以儒顯

見後漢書儒林傳

按巡時所謂古文尚書者孔安國正本也非梅賾

之偽古文尚書

吳進字升臺東平陵人後漢時孔宙門生宙治嚴氏春

秋而進為其門生蓋傳經之士

見孔宙碑陰

按歐陽公集古錄跋尾漢世公卿多自教授聚徒常數百人其親受業者為弟子轉相傳授者為門生故朱氏經義考列吳進於承師條下

魏

劉熹字德怡濟南人三國魏時為下陰縣令博學好古立碑載生徒百餘人其不終業而夭者因葬其地號曰學生墳凡授尚書禮記孝經儀禮左傳易詩者各若干

人

見水經注及集古錄

明

殷峻成化十六年舉人家世傳禮經靈寶許氏遣二子
誥瓚從學誥至戶部尚書瓚至大學士後卒業太學與
襄垣劉氏同舍劉二子龍夔從學龍至兵部尚書夔至
都御史一時言禮者奉為山東大師孫士儋以禮經登
第仕至大學士自有傳

據李攀龍葛守禮
于慎行諸公文集

張潭字德深高祖思信自有傳潭有學行著聲諸生間
提學道陳鏞脩闕里志擇諸生博雅者分纂首屬潭四
方從游者先後七百餘人殷士儋李攀龍最知名攀龍
從以受毛詩於其卒為文以祭推尊甚至士儋表其墓
謂潭操行端謹平居無戲論情容教人隨材誘掖務收

其放心又謂澤絕意科舉之學日與門人究古禮冠婚
喪祭飲射諸儀士大夫家皆質之而後行故濟南漸習
禮俗其沒也士無所質疑遂多獯佻趨簡陋云嘉靖三
十年年七十三卒學者稱三山先生

據墓表

壁城縣志卷第三十九終

歷城縣志卷第四十

列傳六

文苑

環城之山廉削筍立其水源清而流長故生其間者類
皆磊砢奇偉蔚然以文詞耀於時歷檢史冊何其多也
終軍辛棄疾張養浩諸人皆以事功掩其文學予所臚
員平原而下已指不勝僂矣李易安以弱女子為詞家
不祧之祖邊李主盟中夏而接武嗣響紛起里閭間至
於今不絕山川之靈其正有發之不竭者耶作文苑傳

唐

員半千字榮期齊州全節人其先本彭城劉氏十世祖
凝之事宋起部郎及齊篡位奔元魏以忠烈自比伍員
因自姓員終鎮西將軍平涼郡公半千始名餘慶生而
孤為從父鞠愛鞠引通書史客晉州州舉童子房元齡
異之對詔高第已能講易老子長與何彥先同事王義
方以邁秀見賞義方常曰五百歲一賢者生子宜當之
因改今名凡舉八科皆中咸亨中上書自陳臣家貲不
滿千錢有田三十畝粟五十石聞陛下封神岳舉豪英
故嚮錢走京師朝廷九品無敢享親行年三十懷志潔
操未蒙一官不能陳力歸報天子陛下何惜玉陛方寸

地不使臣披露肝膽乎得天下英才五千與推所長有一居先臣當伏死都市書奏不報調武陟尉歲旱勸令殷子良發粟賑民不從及子良謁州半千悉發之下賴以濟刺史大怒囚半千於獄會薛元超持節渡河讓太守曰君有民不能恤使惠出一尉尚可罪耶釋之俄舉岳牧高宗御武成殿問兵家有三陣何謂耶衆未對半千進曰臣聞古者星宿孤虛天陣也山川向背地陣也偏伍彌縫人陣也臣謂不然夫師以義出沛若時雨得天之時為天陣足食約費且耕且戰得地之利為地陣舉三軍士如子弟從父兄得人之和為人陣捨是則何

以戰帝曰善既對策擢高第歷華原武功尉厭卑劇求
為左衛胄曹參軍使吐蕃將行武后曰久聞卿名謂為
古人乃在朝耶境外事不足行宜留待制即日詔入閣
供奉

舊唐書云嗣聖元年
半千為左衛長史

遷司賓寺主簿與邱悅王劇

石抱忠同為宏文館直學士又與路敬淳分日待制顯
福門下因撰明堂新禮三卷上之武后封中嶽又撰封
禪四壇碑十二首以進武后稱善前後賜絹千餘匹長
安中累擢正諫大夫兼右控鶴內供奉半千以控鶴在
古無有而投任者皆浮狹少年非朝廷進德之選請罷
之忤旨左遷水部郎中預脩三教珠英會詔擇牧守除

棣州刺史復入宏文館為學士武三思用事以賢見忌
出濠嶺二州刺史半千不頗任吏常以文雅粉澤故所
至禮化大行睿宗初召為太子右諭德仍學士職累封
平原郡公表丐骸骨有詔聽朝朔望半千事五君有清
白節年老不衰樂山水自放開元九年遊堯山沮水間
愛其地遂定居卒年九十四即葬焉吏民哭野中孫倅
開元間召能言佛道孔子者答問禁中倅方九歲升坐
詞辨注射帝異之曰半千孫固應爾

新唐書本傳
參舊唐書

按舊唐書文苑傳半千開元二年卒與新唐書異

未知孰是

唐奉一齊州人趙明誠錄其所書中宗聖教序又引御史臺記謂奉一善書翰武后時為御史後坐誅削皇族

廢據金石錄

宋

李冠字元伯齊州歷城人舉進士不第得同三禮出身調乾寧主簿師事臨淄賈同同沒冠私諡曰存道先生范諷為淄州通判就見王樵冠寄詩美之以文學稱京東與定陶劉潛齊名卒有東華集二十卷據宋史文苑傳及通鑑

談錄

按李冠舉進士不第而景日珍說嵩所錄嵩陽書

院石柱題名有曰進士李冠皇祐二年三月二十六日遊是三禮出身者亦得稱進士也又文獻通考亦曰齊州李冠與宋史同而天禧二年長清縣重脩廟學記作趙郡李冠蓋署郡望耳岳通志又謂冠卒於官亦不知何據

李格非字文叔濟南人幼甚俊異有司方以詩賦取士格非獨用意經學著禮記說至數十萬言遂登進士第調冀州司戶叅軍試學官為鄆州教授郡守以其貧歛使兼他官謝不可入補太學錄再轉博士以文章受知於蘇軾常著洛陽名園記謂洛陽之盛衰天下治亂之

人地志 卷一 文苑
候也其後洛陽陷於金人以為知言紹聖立句綱元祐
章奏以為檢討不就戾執政意通判廣信軍有道士說
人禍福或中出必乘車叱俗信惑格非遇之途以左右
取車中道士來窮治其姦狀而出諸境召為校書郎遷
著作佐郎禮部員外郎提點京東刑獄以黨籍罷卒年
六十一格非苦心工於詞章陵轍直前無難易可否筆
力不少滯其為文劉後村謂條鬯有義味在晁秦之上
嘗論左馬班范韓之才語奇而確又謂文不可苟作誠
不著則不能工且晉人能文者多矣至劉伯倫酒德頌
陶淵明歸去來辭字字如肺肝出遂高步晉人之上其

誠著也妻王氏拱宸孫女亦善文子遠南渡後任勅局

刪定官女清照

據宋史文苑傳墨莊漫錄文獻通考金石錄後序

按宋史不載格非子姓而清照金石錄後序云有弟遠故知為格非子也格非所作廉先生序石刻在章邱之續江後有兄子迥跋稱先伯先考先叔因知格非有二兄惜其名不傳耳

清照自號易安居士幼有才藻長嫁趙明誠結褵未久明誠即負笈出遊清照書詞錦帕送之嘗以所作詞函致明誠明誠嘆息媿弗逮謝客忘寢食者三日夜得五十闕雜清照詞示友人陸德夫德夫稱絕佳者正清照

作也其舅挺之相徽宗清照獻詩有云炙手可熱心可
寒挺之排元祐黨人甚力格非以黨籍罷清照上詩救
格非有云何況人間父子情識者哀之明誠好儲經籍
及三代鼎彝書畫金石刻連知萊淄二州竭俸入以事
鉛槧清照與共校勘明誠作金石錄考據精確多足正
史書之失清照實助成之靖康二年春明誠奔母喪於
建康半棄所藏其年十二月金人陷青州火其藏書十
餘屋明誠諸城人而家於青也建炎二年起復知建康
府三年召知湖州至行在病卒清照自為文祭之既葬
清照赴台州依其弟迺輾轉避難於越衢諸州紹興二

年又赴杭州所攜古器物以次失去乃為金石錄後叙
自述流離狀甚可憐憫是年五十一矣後適張汝舟頗
自悔流落江湖間以卒清照為詞家大宗嘗謂詞自唐
五代無合格者宋柳永雖協音律而語塵下張子野宋
子京兄弟沈唐元絳晁次膺有妙語而頗碎晏元獻歐
陽永叔蘇子瞻所作似詩之句讀不葺者蓋詞別是一
家知之者少晏叔原賀方回秦少游黃魯直能知之晏
苦無鋪叙賀少典重秦專主情致而少故實黃尚故實
而多疵病世以為名論

據宋史文苑傳金石錄後序
及晁氏讀書志卿家記諸書

田逸民濟南人長於墨竹宣和畫院人其所作極美觀

多作歌風冒雪帶雨含烟之狀

鄧椿
直繼

按四朝詩選有濟南呂同老詩惜其事不可考不能為之傳也姑附於此

金

李之翰字周卿濟南人宋宣和末第進士人有勸叅童貫可以徑至館職者之翰謝不往金兵破洺州之翰被縛見帥語及君臣之際情辭慷慨帥憐之遂被錄用守寧州陷侍郎田珏黨除名徙上京遇赦復官終於東平州判官之翰工詩元好問稱其學有淵源東州詩人未見其比獨其在洺州未知何官子謙靈石尉

據中州集
及遺山詩

王繪字質夫濟南人天會二年進士仕至太常卿嘗注李白詩其武陟道中詩頗稱於世

中州集

按王繪撰大聖院碑署曰少中大夫保德州刺史兼知軍州事以碑文所述考之繪乃皇統九年進士非天會二年且碑作於大定二十八年若登第在太宗天會二年則距作碑時六十七年不應如是之久也

劉昂字次霄濟南人永安五年進士調鄆縣令同官劉光甫稱其高材博學詩時有佳句云

同上

按金史文藝傳別有劉昂興州人與此無涉堯山
堂外紀云劉昂字之昂興州人大定十九年進士
又有劉昂字濟霄者以先有劉昂號小劉之昂據
此則次霄一作濟霄而小劉之昂之字或是衍文
元

張起巖其先章邱人五季避地禹城高祖廸以元帥右
監軍權濟南府事徙家濟南當金之季張榮據有章邱
鄒平諸縣地歲丙寅歸於元太祖廸與子福先後翼之
始終能效忠節福仕為濟南路軍民鎮撫兵鈐轄權府
事生東昌錄事判官鐸鐸生四川行軍儒學副提舉範

範生起巖起巖母邱氏有娠見長蛇數丈入榻下已忽
不見乃驚而誕起巖幼從父學年弱冠以察舉為福山
教諭值縣官捕蝗移攝縣事聽斷明允其民相率曰若
得張教諭為正縣尹吾屬何患焉政成遷章邱登延祐
二年進士第一除同知登州事特旨改集賢修撰轉國
子博士陞國子監丞進翰林待制兼國史院編脩官丁
內艱服除遷為監察御史中書叅政楊廷玉以墨敗臺
臣奉旨就廟堂逮之下吏丞相倒刺沙疾其推辱同列
悉誣臺臣罔上欲置之重辟起巖以新除留臺抗章論
曰臺臣按劾百官論列朝政職使然也今以奉職獲戾

風紀解體正直結舌忠良寒心殊非盛世事且世皇建
臺閣廣言路維持治體陛下即位詔旨動法祖宗今臺
臣坐譴公論杜塞何謂法祖宗耶章三上不報起嚴廷
爭愈急帝感悟事乃得釋猶皆坐罷免還鄉里遷中書
右司員外郎進左司郎中兼經筵官拜太子右贊善丁
外艱服除改燕王府司馬拜禮部尚書文宗親郊起嚴
充大禮使導帝陟降步武有節帝甚嘉之賜賚優渥轉
叅議中書省事寧宗崩燕南妄男子上變言部使者謀
不軌按問皆虛法司謂唐律告叛者不反坐起嚴奮謂
同列曰方今嗣君未立人情危疑宜亟誅此人以杜姦

謀趣有司具獄都人肅然大事尋定中書方列坐銓選
起巖薦一士可用丞相不悅起巖即攝衣而起丞相以
為忤已遷翰林侍讀學士知制誥兼脩國史脩三朝實
錄加同知經筵事御史臺奏除漵西廉訪使不允已而
擢陝西行臺侍御史將行復留為侍講學士拜江南行
臺侍御史召入中臺為侍御史轉燕南廉訪使搏擊豪
強不少貸貧民賴以吐氣滹沱河水為正定害起巖論
封河神為侯爵而移文責之復修其隄防淪其湮鬱患
遂息陞江南行臺御史中丞拜翰林學士承旨知制誥
兼修國史知經筵事右丞相別怯里不花為臺臣所糾

去位未幾再入相諷詞臣言臺章之非起巖執不可俄
拜御史中丞論事剴直無所顧忌與上官多不合詔修
遼金宋三史復命入翰林為承旨充總裁官積階至榮
祿大夫起巖熟於金源典故宋儒道學原委尤多究心
史官有露才自是者每立言未當起巖據理寃定深厚
醇雅理致自足史成年始六十有五遂上疏乞骸骨歸
後四年卒謚文穆起巖面如紫瓊美髯方頤兩眉目清
揚可觀望者欽其雅量臨政決議意所背鄉屹若泰山
不可回奪或時面折人面頸發赤不少怒廟堂憚之識
者謂其外和中剛不受人籠絡如歐陽脩名聞四裔安

南脩貢其陪臣致其世子之辭必候起巖起居恤孝友
少處窮約下帷教授躬致米百里外以養父母撫弟如
石教之官學無不備至舉親族勿克葬者二十餘喪且
買田以給其祭凡獲俸賜必與故人賓客共之卒之日
廩無餘粟家無餘財起巖博學有文善篆隸著述甚富

子二人琳琛

節元史
本傳

潘昂霄字景梁號蒼崖濟南人世以文學顯元初為文
者氣萎蘼不振昂霄采秦漢及唐宋諸大家文以為金
石例講明體制士經其指授者皆有法度歷事六朝官
至翰林侍讀學士通奉大夫卒諡文僖子敏中敏中好

賢下士文雅有父風至正間為饒州路推官嘗平冤獄
有神蛇之異天台陶凱作詩曰潘侯理獄市雪冤類神
明又曰蛇兔涉幽怪事近猶足徵

見金石例序及
林某江西通志

按金石例有其子訓跋事在至正五年同時作序
者皆稱敏中疑敏中即訓之字也但舊志云訓官
江西提刑理問與江西志異姑闕以俟考

李國鳳濟南人至正十年舉鄉試第一十一年舉禮部
第一次趙麟時號鳳麟勝廷試第三甲第三其歷官可
考者十四年為翰林國史院編修官十八年由治書侍
御史同中書叅知政事普顏不花經畧江南二十四年

為中書叅知政事二十六年為左丞史不為立傳而所撰張宓神道碑及移濟寧路治記條達有法度元好問馬祖常數人外不能過也

據元詩選及各碑

按國鳳所作張宓碑有云先兄御史君其名字不可考

張諫字受益號古齋濟南人博學鑒古嘗為江浙行省

檢校

朱存理鐵網珊瑚

吳志淳字主一以字行濟南人工詩善草隸以父廕歷官靖安都昌二縣簿元季棄官寓鄆之東湖至正末執政奏除待制翰林命下為權倖所匿志淳已在耄耄若

不聞焉其詞章翰墨人得之不啻拱壁

成化四明郡志

按吳志淳濟南人見浙江通志而明詩綜作無為

州人俟考

明

張紳字仲紳一字士行自稱雲門山樵亦曰雲門遺老
濟南衛人少從事戎馬間洪武中禮部主事劉康薦其
明經老儒達於治體可備顧問十五年驛召至京授鄆
縣儒學教諭十七年十二月以通政使蔡瑄薦擢都察
院右僉都御史十八年授浙江左布政使紳有才幹不
屑屑於世事慷慨激烈詞辨縱橫終日疊疊不休工大

小篆精於賞鑒法書名畫多所品題撰法書通釋一卷
詩格清健若不經意而自成一家朱彝尊明詩綜謂齊
東自周公謹後復有此人

據實錄及列朝詩明
詩綜陸通志舊志

按陸通志載張紳濟南人舊志謂濟南衛人實錄
謂登州人蓋紳本登州人而籍於濟南衛也陸志
又云以勇略薦而實錄云耆儒明初薦舉以耆儒
為最重紳與鮑恂余銓張長年同徵而紳後至恂
銓長年皆授文華大學士恂等力以老疾辭乃放
歸田里而獨用紳可謂曠典矣紳詩載於列朝詩
集明詩綜者皆琅然可誦鄉人為詩在邊華泉先

者紳也漁洋好表章鄉前輩乃無一言及之何哉
周溥字宗大世次詳子秀傳景泰七年舉鄉試第一由
教諭遷元氏知縣生平無他嗜好惟積書至數千卷遂
自號書樵其為詩文刻苦精融一時咸宗師之年五十
有九卒卒之日猶談詩不已溥嘗講學於壽陽有張蕙
者從之游每相與商榷道術俯仰古今他人輒莫測所
謂一日冒雪訪蕙於系舟山居山之東有碑曰詩人元
遺山墓溥慨歎久之顧謂蕙曰足下他日倘官吾土亦
為吾樹三尺石題曰書樵先生墓足矣後蕙果巡按山
東立碑以誌其事

據墓表

邊貢字庭實號華泉父節自有傳貢生有異質襁褓中
從祖母王受章句輒成誦宏治八年舉鄉試第四明年
成進士授太常博士時孝宗重祠事貢駿奔惟謹偶以
告不與上私語左右曰何不見年少官人耶十八年擢
兵科給事中會孝宗崩上疏劾太監張諭與太醫劉泰
高廷和用藥之悞又劾太監苗遠與保國公朱暉都御
史史琳用兵之失辭義剴切聞者凜然遷太常寺丞以
不善事劉瑾出為衛輝知府正德五年改荊州時藍鄔
寇亟飛輓之務貢以身任之民不擾而事集治行為天
下最六年擢山西提學副使父憂服除起河南提學申

條教勤考校士風大振十二年以母憂歸世宗即位即家起為南京太常寺少卿嘉靖二年晉南京太僕寺卿歷太常寺卿提督四夷館時四夷文體各殊館中諸生無師授貢徵求故譯是正諸文以成一家之學七年轉刑部右侍郎拜戶部尚書皆在南京貢早負才名美風姿所交悉海內名士久官留都優閒無事游覽江山揮毫浮白夜以繼日十年右都御史某劾其縱酒廢職遂致仕歸築萬卷樓於湖上蓄書籍金石古文甚富十一年火幾盡貢仰天大哭曰甚於喪我也遂發病卒年五十七賜祭葬明自永樂後辭尚纖弱貢與李夢陽何景

明徐正卿起而振之號宏治四傑又並以康海王九思
王廷相為七才子去廷相以朱應登顧璘陳沂鄭善夫
為十才子貢詩清婉和粹稱其為人而縣人為詩者實
以貢為首庸子二長翼以廕為太學生官光祿寺丞次
習字仲學能以詩世其家貢固廉吏習貧困負薪授徒
取給饘粥有詩一卷

據李廷相逸公神道碑及明史葉王士正睡足軒詩序

王田字舜耕山東濟南人以縣佐請老歸田材敏喜為
樂府詞贈多人口遠近傳播山水學高房山不失矩度

夏文彥圖繪寶鑑

劉天民字希尹號函山父緒自有傳天民少病瘧九歲

遇一姬刺其十指而愈就外傳日記千言隨父讀書京
邸遂通經史年十五補府諸生正德二年舉鄉試九年
成進士父憂歸服除授戶部福建司主事俄調吏部文
選司主事舊例吏部需人非久試者不得調調亦不即
文選天民負重名故其調速而美著讀選便覽雖有益
吏治而時不能行十四年諫巡幸罰跪五日廷笞三十
嘉靖元年署本司員外郎二年實授遷稽勲司署郎中
時薛蕙在考功與天民齊名有省中二彥之目三年泣
諫大禮復廷笞三十余寬調文選郎中未幾任謫成人
謂寬能吏難其繼天民新繁蒙釋恐不得調已而命下

識不識皆愛得人天民感知遇大推小補盡秉公剔滯
拔淹甚厭衆望時論嘉靖初掌選夏虞中之執天民之
敏皆僅見者給事中陳某嘗著補衣見部為天民所斥
乃上疏指摘對品調壽州知州給事中趙漢御史戴金
等八上章論救不報凡京官外謫者出都門多以眼紗
自蔽天民過故部部方驗封吏數千咸集有識之者曰
此吾恩主無罪左遷者衆擁之馬不得行天民擲眼紗
於地曰吾無愧於衙門使諸君得見吾面目耳縉紳憐
其去祖餞三日始已抵任值歲饑饘災振乏民無菜色
七年遷南京宗人府經歷八年遷南京刑部廣西司郎

中九年遷河南按察司副使分巡大梁時上命刑部錦衣衛鞠河南囚重刑者一千五百餘人得平反者幾七百人天民力為多嘗語人曰吾之遺子孫者祇此足矣十一年為御史胡某所論以才力不及改四川去汴日士民攀泣日夕始出郭十四年考察以冠帶閑住遇恩詔致仕歸則日集賓友嘯傲山水間天民詩有風格多關時事似杜甫晚年好為詞曲為章邱李開先所稱善談論益都黃卿嘗曰同一語出函山口便有意味家居二十年巡撫李上章論薦命未下而天民無病卒年五十六天民母張娠十二月而生無乳庶祖母章棄其二

子而乳之二子遂夭章沒天民感其恩為服喪三年子

三長浦府學生後多顯者

據聞
居集

按壽州志云天民嘉靖四年知壽州崇獎節孝懲
刈頑梗立鄉社以厚風俗北門石橋久圯增修二
百餘丈積穀三萬石備荒此開先所不及附錄於
此

王詔字孟宣其先來強人洪武初徙縣中詔頗秀美顏
辭正德五年舉於鄉久之授知定州地常衝要前牧無
良去者詔示以誠信犷悍遂息蜀人卓某過定遺百金
奔告詔曰弟往尋當有守者至則果然卓謂其人曰何

不攜而去乎曰州人有棄子我公嘗活之我豈忍爾等
轉於我公之境哉御史梁某按部猝入獄惟二囚繫焉
因登上考擢開封同知會朱仙鎮盜起陷尉氏詔往擊
以計捕首虜於扶溝執訊以還嘉靖十七年河決金相
寺口水在地上一丈餘議者謂自孫繼口至清河口百
餘里大興卒塞之須十四萬人領吏六百期六月歲事
計費且十七萬緣詔是時實注治河往勘曰是在我即
湛祭以徒四萬塞焚而自蹈櫓理棹事三月隄成纔佐
吏數十算九千七百餘緡績上賜秩視從四品以母憂
歸比服除日吟嘯繙書帖泊如若忘其嘗仕者詔工五

言詩與劉天民齊名邊貢稱兩生俱俊傑者也在京師
交於何景明有句云雨雪逢人日江湖問客星為時所

傳誦

據李攀龍王
公墓誌銘

谷繼宗字嗣興號少岱濟南衛人幼好學家貧嘗走寺
廟撥爐灰取遺炷其母綰為一束然以照夜讀舉正德
八年鄉試嘉靖五年成進士終宜興知縣繼宗嘗以積
憂而瞽避人依章邱李開先章邱士人爭攜酒肴為之
主居九十日作詩數百篇贈開先長律百七十句雖有
目者檢類書為之不能及其詳雅後遇良醫刺之復明
其詩集崇正十二年燬於火

據舊志及
開居集

按列朝詩集云歷下有劉汝松谷繼宗者皆舉進士有詩名谷亦能填詞而詩俱未工又云嗣興富於篇什以倚待立就為能故可傳者絕罕

又按谷嗣興撰趙繼本墓碑畧少岱野史谷蘭宗嗣興而舊志俱作繼宗或通籍後改為蘭耶要非二人也

李攀龍字于鱗號滄溟世為縣人父寶以貲事德莊王為郎善酒任俠不問家人生產母張夢日入懷生攀龍九歲孤苦學母緝鱸給脩脯晉江王慎中視學山東奇其文首擢之嘉靖十九年舉鄉試第二二十三年成進

試吏部文選司二十四年以疾歸益發憤為古學
文自西漢詩自天寶而下不以污豪素二十五年入京
師充順天鄉試同考官簡拔多奇士二十六年授刑部
廣東司主事歷負外郎山西司郎中有邊將觸法不至
死者柄臣子銜其不賂必欲置諸辟攀龍力持不可得
末減其人卒自奮功名致大帥三十二年出為順德知
府攀龍嫉當世流俗之論以為文士無所短長思以經
術緣飾吏治有所興除務便民順德故有牧馬場民久
耕業其中共繇賦而監司誤以為營馬牧地歲增賦至
三千金攀龍請悉蠲之將作所徵順德視正定大名諸

旁郡攀龍以為郡故陋貧民不當他郡比請裁其費比
正定十之三又留永濟倉粟無灌輸京師以餉戍卒增
設永年縣傳於沙河邯鄲界中寬二邑力移通判鎮鉅
鹿官亭以扼盜衝移巡檢黃榆嶺為晉趙關前後請白
於臺得報可滿三歲擢按察副使視陝西學政其鄉人
東阿殷學為巡撫以檄致攀龍使屬文攀龍不懌曰副
使其屬學政非其屬也且文可檄致耶會關陝地裂後
數動搖心悸念母老上疏乞歸吏部惜其去特請予告
故事外臣無在告者獨何景明前亦以副使予告蓋異
數也歸則搆一樓鮑山華不注間曰白雪樓居之郡守

以上諸謁輒謝病造謁數四終不一見亦無所報以是
得簡亢聲家居將十年隆慶初用薦起浙江按察副使
二年遷叅政奉表入賀道遷河南按察使攀龍至是推
亢為和賓客亦稍稍進無何以母喪歸哀毀致疾逾小
祥暴心痛一夕卒年五十七攀龍始官刑曹與李先芳
謝榛吳維嶽輩倡詩社王世貞勅釋褐先芳引入社遂
與攀龍定交明年先芳出為外吏又二年宗臣梁有譽
入是為五子未幾徐中行吳國倫亦至乃改稱七子七
子之名播天下擯先芳維嶽不與已而榛亦被擯攀龍
遂為之魁其詩格高峻與世貞名相匹天下亦並稱王

李獨為文及樂府多所摹擬頗為世所挾摘子駒字千里號松盤歲貢生世貞謂其博學能文章有父風

據明史及

墓誌銘傳并

青門篋葉

許邦才字殿卿其先棗強人五世祖伯成遷於縣父鏊字待時府學生因母疾究方書疾良已邦才少讀書城南山中舉嘉靖二十二年鄉試第一與李攀龍殷士儋遊詩風格近攀龍而無客氣或以為溫厚過於攀龍初知趙州有裝索將置而去者妻孟叱而擲之無何調永寧行萬里無難色題詩山家藹惻得風人之旨遷德府右長史勘中官某獄又有餉珠珥於孟者孟曰安用此

補主加諸首豈以為有廉吏未必有廉婦乎四十二年

補周府左長史加四品服俸久之卒子復府諸生

據列朝詩

集滄溟集照書

潘子兩字潤夫嘉靖二十二年舉人與李攀龍同時而

為詩自盡其才王世貞謂歷下詩人各騁於康莊之途

而無犯轍讀潤夫詩者知為潤夫詩也由知縣仕至行

太僕少卿有政聲弟子震華縣訓導亦能詩

據弇州四部集及舊

志

張弓字希仲號月梧少為諸生有名舉嘉靖二十五年

鄉試第五久不第授淮安通判以才稱同官忌之為下

石罷去歸則杜門守一編吟詩自娛長吏造請皆稱病
不見人以此高之

據月梧集序

王大儒字汝為舊志載其詩二首甚有奇氣

據舊志

按舊志無文苑傳而有詩人一門僅列姓名及所
著集而已未為立傳也所列唐崔融宋李冠李格
非李芝李清照辛棄疾呂頤浩元潘昂霄張起巖
明邊貢劉天民王詒陳輞張弓谷繼宗范瑟金城
李攀龍許邦才光廬任登瀛潘子雨潘子震劉選
張邦基薛照劉亮采劉勅共二十七人今於其卓
卓者皆為之傳或見別傳或見藝文考而張邦基

薛照事少無所附舊志云邦基有歷下八景詩照
擅臨池之業亦能詩又舊志不列於詩人而附綴
一二語於選舉條下者進士則方守地云能詩文
歲貢則董光馬一乾皆云能詩趙克塾云能詩文
張夢兆云博學能詩精天文陳彥劉遜楊衍嗣皆
云能詩選貢賈嗣照云有和陳方伯落花吟三十
首王德璋云能詩文監生則李化魯云能詩劉謙
光云博學能詩文共十四人聊附見於此

又按宋仲良山左明詩鈔所選歷城人舊志不言
其能詩者又有封術于達正楊謹薛耒張玉珍其

詩皆佳附記於此

國朝

王革字秋史號蓼谷其先臨山衛人父鉞官江南上元
後衛守備始徙於縣革性孝好讀書負才落拓視鄉里
人無當意者鄉里人羣起而譟之自信乃益堅德州田
雯過歷下見其詩物色之遂補諸生雯稱於巡撫張鵬
延見講布衣之好顧終以坎壈而詩益愜髣有奇氣所
居草堂為明大學士殷士儋別業在望水泉上頗擅水
樹之勝革吟哦其間有黃葉林間自著書句新城王士
正絕愛之呼為王黃葉名藉甚嘗曰吾受知於新城德

意作茂陵劉郎也歸則家益落而意氣自如由監生捐

授州同職卒年四十一

朱攸錄送

曾傳字式魯懷樸孫也出嗣溫州知府燕弱冠補諸生
薄時藝不讀而試輒冠其偶好為詩尤愛李賀溫庭筠
時慕倣之灤源山長傅王露桑調元皆謂一時無其匹
也酷嗜飲一日不持杯勺則奄然若病醉輒嫚罵時士
無足當其意者乾隆二十一年舉鄉試會試屢不第益
湏於酒得病知不起檢篋中詩讀一過輒焚之至焚竟
而死年四十有五

同上

劉伍寬字蒲若號此亭其先觀城人父國愬歲貢生遷

於縣伍寬少聰穎年十二日成八藝十八歲巡鹽御史
劉灝觀風取第一招入署讀書補諸生名大噪鄉試數
薦不遇雍正七年年五十始拔入成均為詩力追眉山
敏捷不屬草嘗觀劇京師人皆擲金為纏頭贈伍寬取
紙扇十餘柄各予一絕句皆肖其音貌曲未終而畢一
時傳為美談性孤峻意不可一世而家貧無恒產并日
而食泊如也新城王士正子姓赴試俾主伍寬家且曰
劉君高士又能詩得款接為幸勿厭所居之偏仄耳其
傾慕如此灝卒京邸伍寬感知已千里臨其喪著叩扉
集以哀之又走博山乞趙執信志其墓晚年擬取選教

諭竟不就年六十七卒

鄭銘採訪

田渥字露湛居明湖側授徒食貧與劉伍寬相倡和詩

亦新逸有遺稿三卷以諸生終

劉士愚採訪

宋云鈺字凝西其先章邨人祖某徙於縣云鈺篤學而

數奇年二十七始補諸生康熙五十年鄉試已擬第三

人移置副榜五十六年復擬第一而索二三場卷不得

其為制藝取法甚古請業者趾相錯於門拾其唾餘皆

取高第而云鈺無所遇性簡峻座主陳世倌巡撫山東

某役不法將重懲役持多金乞為緩頰却之曰此非讀

書人所為也年八十二卒門人私謚曰文節先生

鍾鼎採訪

張文箕字維南縣諸生高才有盛名客游京師安溪李
又貞公見其文亟稱之其所刻稿半文貞評次又為納
監就試順天卒不遇而襟抱蕭散雖坎壈終身洒如也
年六十一卒有肖巖詩集如干卷

中士秀
錄送

歷城縣志卷第四十終